

清光緒朝中日交涉史料

卷五七之卷五八
二十六年

蘇子知覺

PDG

清光緒朝中日交涉史料卷五七

(四〇〇〇)大學士李鴻章奏報北上會議起程日期摺

光緒二十六年八月二十日

全權大臣大學士直隸總督臣李鴻章跪奏爲遵旨北上會議恭報起程日期仰祈聖鑒事
竊臣於八月十四日接直隸藩司廷雍電稱七月三十日奉上諭全權大臣李鴻章着准其
便宜行事將應辦事宜迅速辦理朕不爲遙制接此旨先行覆奏以慰廑系欽此又於八月
十六日接山東巡撫袁世凱來電八月初三日奉上諭全權大臣便宜行事大學士李鴻章
著卽乘輪船來京會同慶親王商辦一切事宜毋延欽此仰蒙眷倚優隆迴逾常格欽悚莫
名臣自抵上海卽與各國駐使迭次電商該外部業將各外部覆語節經具奏在案上月聯
軍入京乘輿西幸北望宮廷徒深憤恨曾由六百里加緊請旨添派慶親王等會同開議此
次變出非常各國之意決非空言所能就範臣往返電商唇焦穎禿俄日法美雖稍有通融
德英仍別有意見一旦德國統帥帶重兵來華更不知其意向所在是議和一事就目前情
形而論尙無把握臣受恩深重具有天良君父之難理應奔赴惟視其心力之所能爲冀圖
挽救至於成敗利鈍非可逆覩現聞慶親王已遵旨回京臣卽於八月二十一日借乘俄艦
由海道赴津如前途洋兵無阻卽行晉京與慶親王會商一切設法速辦以慰宸廑所有遵

旨覆奏並起程日期仍電由護陝西撫臣端方代爲繕摺由驛六百里加緊馳陳伏乞皇太后皇上聖鑒謹奏光緒二十六年八月二十四日奉硃批知道了著俟到津後卽行進京會商一切力爲其難是所切盼欽此

(四〇〇一)護理陝西巡撫布政使端方譯呈李鴻章電奏清摺

光緒二十六年八月二十四日到

護理陝西巡撫布政使端方謹將上海來大學士調任直隸總督李鴻章電照譯由六百里加緊夾板呈遞行在軍機處

前奉便宜行事諭旨錄寄各國使領接楊儒篠稱譯交外部截稱便宜行事在中國仍是虛文非真代君行權如歐洲故事且細釋諭旨無還宮意勢必遲延牽制議結無期他國早慮及此果爾各國一律撤兵德統帥來恐別有辦法速電傳相請貴大皇帝降旨略謂各國兵來本係救使現俄已踐約撤兵各國自應照辦刻下亟須籌議善後遠道萬難遙制一俟各軍全撤准卽日還宮以便開議茲特派某大臣與各國統領接洽交收都城又特授某大臣辦事全權向各國商議云云如此措詞俄便易居間排解可冀各國一律撤兵迅速議結等語務乞代奏以救危局云鴻查欽奉八月十五日電旨俟抵太原後體察情形再定進止洵

爲慎重萬全之策似可准俄外部所請降旨俟各國軍全撤卽行還宮慶親王現已到京應請特派與各國統領接洽交收都城臣鴻章定於二十一日乘俄艦赴津如各使來會卽與商議是否有當伏候聖裁惟聞俄商各國同撤德英未允旣請俄居間不妨有此詔旨耳乞代奏鴻效

(四〇〇二)軍機處寄慶親王奕劻上諭

光緒二十六年八月二十四日
上諭檔

軍機大臣字寄慶親王奕光緒二十六年八月二十四日奉上諭李鴻章電奏請明降諭旨等語俄兵先撤雖有此言尙未見諸實事亦斷無回鑾後再行開議之理所請窒礙難行惟俄兵如果先撤該王自可援以爲詞勸各國一律撤兵著卽體察情形速籌辦理李鴻章電奏並鈔給閱看將此由六百里諭令知之欽此遵旨寄信前來

(四〇〇三)大學士李鴻章等密陳事機萬緊並請懲辦統率拳匪之莊親王等摺

光緒二十六年八月二十二日
光緒二十六年八月二十五日到

全權大臣大學士臣李鴻章南洋大臣兩江總督臣劉坤一湖廣總督臣張之洞山東巡撫

臣袁世凱跪奏爲事機萬緊恭摺密陳仰祈聖鑒事竊俄允商各國撤兵而必欲兩宮回鑾德新使致臣之洞電必欲先辦主持拳黨之人而後開議臣鴻章在滬晤德使和蘭使及副總稅司裴式楷各國總領事等所言皆同是知各國公憤所在斷難偏護若遷延不辦恐各國變其宗旨愈久愈不可收拾臣鴻章本日已將登舟北上適接臣坤一等來電均稱伏讀八月十五日電旨罪在朕躬悔何可及不禁感愧涕零實在罪在臣下中外皆知無可掩飾欲求救急了事之法惟有仰懇聖明立斷先將統率拳匪之莊親王載勛協辦大學士剛毅右翼總兵載瀾左翼總兵英年及庇縱拳匪之端郡王載漪查辦不實之刑部尙書趙舒翹等先行分別革職撤差聽候懲辦明降諭旨歸罪於該王大臣等以謝天下以昭聖德臣鴻章即可宣告各國與之剋期開議是否有當伏乞皇太后皇上宸斷施行事關宗社存亡不敢稍避嫌怨謹合詞冒死瀝陳不勝迫切待命之至謹奏光緒二十六年八月二十二日

(四〇〇四)慶親王奕劻奏陳接晤各國公使情形摺

光緒二十六年八月十八日

奴才奕劻跪奏爲謹將接晤各國公使情形先行奏陳恭摺仰祈聖鑒事竊奴才於宣化途次奉命回京辦理和議事宜遵於本月初十日馳抵京城業將到京日期專摺具奏在案十

一日總稅務司赫德來見告以此次遵旨回京便宜行事一俟全權大臣李鴻章來京即可訂期開議囑其隨時幫助等因並由奴才恭錄諭旨照會日國領銜使臣葛絡幹囑轉達各國使臣去後十二日日本統兵大臣福島交到大理寺少卿盛宣懷七月二十四日上海來電據稱李鴻章刻尙在滬專俟奴才到京卽行航海前來當由奴才電催李鴻章速由海道來京商辦和議仍由日本兵官福島轉電上海未知何日始達奴才以款事一時未能開議而各國使臣現在京城自應先行接晤以資聯絡因於十三日偕同總理衙門大臣那桐往拜俄英美日法意比日本各公使備述此次拳教相仇致使各國動兵並婉謝各國洋兵保護宗社臣民盛意德國使館以該國新派使臣刻未到京請俟公使到後再行接晤奴才與各該使等談次僉稱各國仍願修好惟尙未奉到本國國家訓條無從議辦現聞順直境內尙有義和拳不時攻擊教堂擬派洋兵前往各村莊勦捕但恐良莠不分請中國自行實力勦辦勿再貽誤並據俄使格爾思聲稱豐台一帶現修鐵路仍有義和拳放槍滋事請一併查拏辦理而總稅務司亦云近日南苑內時有槍聲經洋兵十餘人馳往攻擊竟槍斃義和團數百足見此輩不足倚恃只能貽累國家請從嚴捕治勿再搖惑各等語當經咨行護直隸總督廷雍迅速派幹員於順直境內查辦解散俾免生靈塗炭另滋事端十四日俄使格

爾思來見據稱東三省並未停戰於和局大有妨礙請電各該將軍先行停戰俄國亦斷無再行開戰之理庶將來議款較有裨益奴才再四籌思若不停戰難以開議亦經電該將軍等遵照由俄使轉電在案此十三等日與各國使臣並總稅務司會晤之情形也伏查和局一日不定人心一日不安李鴻章現尙在滬雖經奴才電催到京尙需時日而各國使臣均以尙未奉到本國國家訓條爲詞意存叵測難保無恫喝要挾各情事當此時勢憂危大局糜爛辦事艱窘情狀自在聖明洞鑒之中奴才受恩深重誼同休戚惟有殫竭愚忱俟李鴻章到京卽將一切應議事宜和衷商權與各國使臣訂期會議但能補救一分庶獲一分之益以期仰副皇太后皇上上保宗社下拯臣民之至意所有奴才先行接晤各使臣大致情形理合恭摺具奏伏乞皇太后皇上聖鑒訓示再京城爲洋兵佔據小民生計維艱煤米兩項尤虞缺乏刻擬招商販運商令赫德酌撥洋兵沿途保護入城以資利用而蘇民困合併聲明謹奏光緒二十六年八月二十五日奉硃批另有旨欽此

(四〇〇五)軍機處寄慶親王奕劻上諭一

光緒二十六年八月二十五日
上諭檔

軍機大臣字寄慶親王奕光緒二十六年八月二十五日奉上諭李鴻章等奏事機萬緊請

將統率拳匪之莊親王等先行分別懲辦一摺李鴻章計日到京著奕劻與該大學士體察各國實在情形究竟如何切實會商卽行具奏原摺著鈔給閱看將此由六百里諭令知之欽此遵旨寄信前來

(四〇〇六)軍機處寄慶親王奕劻上諭二

光緒二十六年八月二十五日
上諭檔

軍機大臣字寄慶親王奕光緒二十六年八月二十五日奉上諭奕劻奏接晤各國公使情形一摺覽奏均悉昨據李鴻章電奏定於二十一日起程不日應可到京該王務當會同該大學士等和衷商榷與各國使臣訂期開議以期補救時艱挽回危局將此由六百里諭令知之欽此遵旨寄信前來

(四〇〇七)軍機處寄護理直隸總督布政使廷雍上諭

光緒二十六年八月二十六日
上諭檔

軍機大臣字寄護理直隸總督布政使廷光緒二十六年八月二十六日奉上諭近聞保定之東閭村安家莊等處教堂仍有兵團攻擊殊與朝廷現在辦理情形相背總之教民麀聚

一處其有特衆出掠者自不能不懲辦若僅止因疑生懼負隅自保此時辦法惟有切實開導俾之坦然無疑自可相安無事其團民卽著速爲解散勿任聚處橫行又聞近京馬家堡地方亦有拳民滋事併著迅速查明遣散勿令洋人以自行剿匪爲名四出滋擾大局更難收拾將此由五百里諭令知之欽此遵旨寄信前來

(四〇〇八)軍機處寄大學士榮祿上諭

光緒二十六年八月二十七日
上諭檔

軍機大臣字寄大學士榮光緒二十六年八月二十七日奉上諭榮祿奏馳抵保定日期並請飭查恩祥等下落及程文炳一軍應否開赴行在各摺片覽奏均悉事機萬難是在意中該大學士務當與慶親王奕劻李鴻章等切實妥商向各使臣極力磋磨如有萬難應允之事先爲駁去是爲至要程文炳總統各軍前已有旨飭赴潼關外秦豫連界地方扼要駐紮奇克伸布已赴行在暫交馬玉崑節制分防後路至恩祥下落該大學士迅卽咨行東三省及寧夏各將軍查明嚴行懲辦將此由六百里諭令知之欽此遵旨寄信前來

(四〇〇九)大學士榮祿奏報馳抵保定日期摺

光緒二十六年八月二十三日

奴才榮祿跪奏爲恭報奴才馳抵保定日期仰祈聖鑒事竊奴才於本月十六日在鐃石驛途次接奉廷寄令奴才迅回保定與慶親王奕劻大學士李鴻章等會辦款議奴才當卽恭摺覆奏並聲明拜摺後卽祈回平定州連日趲程而進茲於二十二日行抵保定省城知李鴻章有本月二十一日乘坐俄輪船由滬來津之信適接奕劻專弁改易服色裝爲乞丐由京送出致奴才之函內稱初十日到京因候李鴻章尙未開議擬先將地面略爲料理爲綏靖人心之計又稱現在京城暫歸外國管轄出入城門須預行知照以便保護又謂奴才進京時須先期遣妥人進城告知隨帶人數統俟知照外國兵官後再行進城庶保萬全切勿帶護衛兵弁並一切軍器等語是洋人驕橫情形已可概見此次停戰議和殊非易易其關係至重事機萬難早在聖明洞鑒之中奴才惟有殫竭血誠與奕劻李鴻章等妥爲籌商但使果能轉危爲安有裨國事奴才卽捐糜頂踵亦復何所顧惜所有奴才馳抵保定緣由謹恭摺馳陳伏乞皇后太皇上聖鑒再奴才經過晉直境界各府州縣居民稍安漸有復業者惟涿良一帶拳匪仍行充斥若不及早淨絕根株必致又成鉅患刻已由護督臣廷雍派撥隊伍實力勦辦庶可弭禍變而定民心合併陳明謹奏光緒二十六年八月二十七日奉硃批另有旨欽此

(四〇一〇)都察院左副都御史何乃瑩奏陳就晉省現在情形預籌布置辦法摺

光緒二十六年八月二十九日

二品銜都察院左副都御史臣何乃瑩跪奏爲就晉省現在情形謹籌布置恭摺縷陳仰祈聖鑒事竊查晉省地勢表裏山河在春秋時最稱疆國近因團教相仇變起倉猝聖駕恭奉慈輿暫幸太原並恭讀疊次諭旨飭大小臣工速赴行在以期整理庶務仰見宵旰憂勤無刻不以宗社民生爲念臣愚以爲時至今日正國家危急之秋應辦之事當相其大小遠近之機以爲緩急次第圖之謹釐爲四條以備采擇一宜慎籌進止以繫人心也以今日論至大至遠之計無過建都我朝定鼎燕京二百餘年據上游而控天下最爲形勝自海禁開而我之所恃以爲險者竟成腦後之隙輪船無阻火車又通彼族朝發夕至雖有責獲之勇無以禦之不待智者而知其難守也鑒此失者不得不創遷都之議太原形勢迫狹非可久駐關中踞天下上游接壤隴蜀進戰退守可以裕如聞前已有旨飭陝西撫臣端方經營宮室以備巡幸仰見聖明洞察先事預籌惟刻下正在議和未定之時恐敵人聞我決意西遷則直隸全境非我所有掣動全局陵寢宗社所在何堪設想卽津沽門戶並鐵路皆視爲無足

重輕必至別生要挾且聞直隸臣民無刻不望車駕還宮是西巡之議但可默定未可遽宣以繫舊京之望以安彼族之心庶和局易成而覬覦可免一晉省邊境宜分兵防守也撫臣毓賢扼守固關自是險要之地然晉省南路實以獲鹿山口爲第一重門戶井陘維水爲第二重門戶若至固關則山川之險已與敵共之矣擬請旨選派健將駐紮獲鹿井陘一帶節節把守與固關聯絡一氣以期鞏固無虞北路則宣大最爲要隘其餘各路山僻小徑所在多有亦宜隨處設防現在甘軍豫軍湘軍皆在省城可否酌撥分防各要隘非特可以禦敵且可使之習苦以免日久生懈或慮省城兵單不足以資保衛不知省城自撫臣收撫團民嚴辦教民之後附近極爲安帖無煩多兵駐守徒侵民食況此次搶掠行旅皆係潰兵並無土匪兵多之害已可概見但使四境嚴防省城自然無恐即使有事徵調亦不難立至總之兵宜散處不宜聚集宜習勞不宜安逸迨其生事而軍法治之不如預爲之防正所以保全之也一宜速飭各省運糧來晉以濟民食也晉省山多產糧極少本年春夏頗形亢旱自駐蹕之日始得甘雨民情歡忭然糧價仍復昂貴轉瞬嚴冬河凍購運艱難兵飢而譁民餓而斃和局未定又安知兵事之果可消弭萬一閉關自守糧餉不濟策應無方勢將束手必須預籌以防未然臣風聞與晉省相近之直隸河南山東陝西甘肅等省秋成均尙可觀間有

水路可通若空文往催終恐無濟擬請旨飭下各該省督撫臣指撥的款派員購運限十月以前陸續運到無論白米雜糧運到時卽交地方官責成該糧行領賣定其價直使該行稍有餘利其正價易銀存庫卽可抵各該省應解之餉兵民旣不乏食餉項又無虧闕庶可免飢潰之虞一制錢宜速籌接濟也晉省經撫臣開局鑄錢與民生大有裨益近日復設立官錢局並出錢條以資周轉銀價得以稍增辦理已極得法惟聞錢店除官錢局之外半皆歇業省城之大兌換只此一家萬難供應且恐存錢止有此數倘或告匱勢必立窘擬請旨電飭湖北等省速運銀圓數萬來晉亦可佐制錢之用並飭地方官出示曉諭各行仿照京城銀市辦法准其銀錢互易彼此流通錢行自不敢居奇以上四條係就目前情形當務之急臣愚皆爲思患預防起見是否有當謹恭摺縷陳管窺冒瀆伏乞皇太后皇上聖鑒訓示謹奏光緒二十六年八月二十九日

(四〇一一)山西道監察御史彭述請遷長安以減後患暫緩啓鑾以就和議摺

光緒二十六年八月二十九日

掌山西道監察御史臣彭述跪奏爲請遷長安以減後患暫緩啓鑾以就和議恭摺仰祈聖

鑒事竊臣風聞各國有請皇太后皇上回鑾之說又有廷臣恭請速往長安之議何所適從在朝廷自有主宰臣顧有請者數十年來各國殫精竭慮力爭北洋要害無非爲逼近都城動輒要挾今若舍而他往實奪伊等已得之利權此各國所以回鑾之請也咸同之間長髮捻回逆氛幾滿天下所失何止數百城而都城並未震動卒能以次恢復今則失一城而天津破失二城而都城空若再不爲遷都之計將日日在危急之中而爲人所制後患益不可勝言矣太原地狹物稀且現距敵較近誠不可以久居長安則關河四塞爲自古帝王之都論天下形勢固未有踰乎此者但各國恭請回鑾旣已未奉俞允且卽遷長安是不啻各國速之行也各國其能無疑乎疑而與之言和恐彼要挾更多或有萬難應許之事似不如暫時駐蹕太原以待和議伴示回鑾之意而不予以確據堅持西遷之心而不可以聲張一俟和議旣成卽指長安毋任或持異議致不果行緩急之間關係匪淺是惟皇太后皇上經權互用庶幾大局幸甚謹恭摺具陳伏乞皇太后皇上聖鑒謹奏光緒廿六年八月廿九日

(四〇一二)都察院代遞禮部主事王士傑條陳摺

光緒二十六年八月二十九日

都察院左都御史臣英年等跪奏爲據呈代奏事據禮部主事王士傑遞到條陳一件臣等

公同閱看尙無違悖字樣理合代呈伏祈皇太后皇上聖鑒謹奏光緒二十六年八月二十九日左都御史臣英年左副都御史臣何乃瑩

(四〇一二)附件一 禮部主事王士傑呈文

具呈禮部主事王士傑謹呈爲懇請代奏事竊士傑恭讀七月二十六日及二十八日兩次上諭以夷人驚犯督邑乘輿播遷懲前毖後引咎罪己並飭大小臣工激發天良竭誠獻替共濟時艱辭旨深切讀之痛心屬在臣子無不感激涕零思圖報効士傑雖知識庸淺職分卑微不敢妄參末議而私衷所激不能自己且念主辱臣死之時仍復拘守成例多所顧忌此正諭旨所謂無効忠之心深負朝廷者士傑雖不材竊引爲恥謹就管見所及當今最切要者三端縷析陳之一戰事不宜遽停也此次中外失和因拳教相仇變起倉卒海口旣未嚴防內地亦未固守在前敵者惟宋慶馬玉崑兩軍尙爲可恃其餘徵調各軍居多未至董福祥一軍素稱敢戰又爲都中洋人牽制未能盡往接應孤軍抗敵勢有難支李秉衡甫經出都又復猝被掩襲是則津通淪陷都城失守固由夷兵強橫亦由中國變故猝乘諸事無備故耳設外有防守內無牽綴兵力稍厚互相策應夷人雖善戰亦安能長驅至此今雖播

之餘而廟堂之謨不宜自餒將帥之心不宜少懈現聞宋慶馬玉崑董福祥等皆在此屯駐不獨此地窮苦艱於供給而前敵無得力之軍亦恐損國威而長敵餒應請旨就現有各軍酌派若干營歸何人管帶隨扈聖駕其餘宜令速加整頓散者收之缺者補之重與作新再接再厲馳赴直隸等處扼要駐札以備戰守並與續到各軍互爲聲援機有可乘卽力挫其兇鋒勢有難勝亦嚴杜其深入庶人心不搖而大局可冀挽回此事之切不可緩者也一和議不宜太亟也時事至此自不能不出於議和然和之意存乎我而和之事仍視乎人自古馭夷之道能守能戰而後能和夷情貪狡得步進步歷來議和皆示以不和之勢而後和議可成若彼方得勝我遽議和將謂中國不復敢戰貪心必大啓谿壑必難盈前年止日本一國中原精華幾盡此次國衆欲奢要求必甚於前從之則我難自立不從則彼必脅制思之寒心可爲深慮爲今之計莫若速整各軍力備戰守但得一勝和卽易成卽令不能驟勝而我處處有備無隙可乘彼以深入異地之師且處族衆權分互爲猜忌之勢亦必不敢輕逞狂鋒庶議和之際不至由彼要挾而和局可望有成矣一建都宜舍舊圖新據形勝之地以爲興復之基也昔人論建都者皆以燕京關中太原爲最燕京左海右山重關複嶺據上游以制天下誠得形勢之雄矣乃時異勢殊難可概論各國通商以來輪船往來無阻津地久

爲各國盤踞旅順又爲俄人劃分門戶不固險要全失由大沽至京僅三百餘里輪車頃刻可達而京中東交民巷西什庫兩處洋房又爲肘腋之患他日收復之後亦止可備巡幸而不可復居亦明矣太原表裏山河三晉舊地亦可立國而地方狹隘土瘠民貧又山路崎嶇轉輸不易現因人情惶惑暫此駐蹕以繫天下之望誠爲至計若欲久居則規模狹小屏蔽單弱京津少有警信此地卽不免震動恐非久安之所也關中沃野千里四塞爲固形勢旣壯門戶尤嚴漢唐轉漕舊道重加修復卽可通行且去海疆較遠偶有疏失亦易挽救居中圖治無善此者應請旨飭下陝西巡撫速行預備一切規模能儉勿奢工程稍就卽便臨幸以立中興之業以宏遠大之規天下臣民實爲至幸凡此三者皆當今補救之急務伏望聖衷早斷堅定不移勿以前此小挫而墮振作之心勿以暫時少安而忘後日之患奮勵以策將士憂危以濟艱難轉禍爲福易危爲安正在此時士傑不勝激切悚惶之至謹繕條陳伏乞據情代奏謹呈

(四〇一三)章京鮑心增條陳時務呈文

光緒二十六年八月二十九日

章京鮑心增爲事關大局安危暫宜慎重謹陳愚慮所及呈請代奏仰祈聖鑒事竊近年北